

**Agong Tiba Di Brunei Untuk Lawatan Negara Selama Tiga Hari
Bernama
09 Mei, 2012
Daripada Mohd Razman Abdullah**

BANDAR SERI BEGAWAN, 9 Mei (Bernama) -- Yang di-Pertuan Agong Tuanku Abdul Halim Mu'adzam Shah dan Raja Permaisuri Agong Tuanku Hajah Haminah berangkat tiba di sini Rabu untuk lawatan negara selama tiga hari.

Pesawat yang membawa Seri Paduka berdua mendarat di Lapangan Terbang Antarabangsa Brunei di sini pukul 5.30 petang.

Seri Paduka disambut Paduka Seri Duli Pengiran Muda Abdul Azim Sultan Hassanal Bolkiah, Paduka Seri Pengiran Anak Puteri Rashidah Sa'adatul Bolkiah Sultan Hassanal Bolkiah dan Menteri Pendidikan Brunei Datuk Seri Setia Awang Abu Bakar Apong.

Dalam lawatan itu Seri Paduka diiringi Menteri Wilayah Persekutuan dan Kesejahteraan Bandar Datuk Raja Nong Chik Raja Zainal Abidin dan isteri, Datin Nafesah Nong Chik serta Ketua Setiausaha Kementerian Luar Tan Sri Mohd Radzi Abdul Rahman. Lawatan Tuanku Abdul Halim ini merupakan yang pertama oleh Seri Paduka setelah ditabal sebagai Yang di-Pertuan Agong XIV pada 11 April lepas.

Seri Paduka berdua akan berangkat ke Majlis Santapan Malam bersama rakyat Malaysia di Brunei pada pukul 8 malam.

Menurut laporan Kementerian Luar dianggarkan 30,000 rakyat Malaysia bertugas di Brunei.

Pada Khamis, Tuanku Abdul Halim dan Tuanku Hajah Haminah dijadual berangkat ke Istana Nurul Iman di sini untuk bertemu Sultan Brunei Sultan Hassanal Bolkiah bagi lawatan kerja majlis kunjungan muhibbah pada pukul 10.30 pagi.

Pada 2.40 petang Seri Paduka dan Raja Permaisuri akan berangkat ke Balai Pameran Islam Sultan Haji Hassanal Bolkiah di Jabatan Mufti Kerajaan, di sini.

Pada 8 malam, Seri Paduka berdua akan berangkat ke Istana Darul Hana untuk majlis Santapan Negara dengan Sultan Brunei. Pada hari Jumaat, Baginda akan menunaikan solat Jumaat di Masjid Jamek 'Asr Hassanil Bolkiah di sini bersama Sultan Brunei dan rakyat Brunei.

Baginda dan Raja Permaisuri dijadual berangkat pulang ke Malaysia pada pukul 3.50 petang.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=664883>